

Accord de principe Klimabündnis

Haut leegent jo quasi kee méi, dass de Klimawandel am gaangen ass. Regelméisseg gëtt een an den Noriichten iwwert déi katastrophal Konsequenzen, déi heen ka mat sech bréngen, informéiert. Dëst wäert an de nächste Joeren a Joerzénge ëmmer schlimmer ginn, wa mer net d'Steier nach ronderëm gerappt kréien.

Leittragend vun de Klimakatastrofen sinn haaptsächlech d'Entwécklungslänner déi awer net den Haaptverursacher vum Klimawandel sinn. Et sinn virun allem déi industrialiséiert Länner an deelweis och d'Schwellelänner déi déi meeschten Zäregasen an d'Lut blosen, déi jo de Verursaachen vum Klimawandel sinn. Lëtzebuerger sinn an de Pro Kapp CO₂-Emissiounen souguer rekordverdächtig.

Et ass wichteg, dass ob alle Niveauen probéiert gëtt dësen Klimawandel ze bekämpfen.

D'Gemeng Käerjeng huet schonn zënter Joeren, ënnert der Mataarbecht vun déi gréng, eng Politik bedriwwen fir manner Energie ze verbrauchen an sou manner CO₂ ze produzéieren.

Mär sinn eis awer bewusst, fir eiser Responsabilitéit vis-à-vis dem Klima gerecht zeginn, dass mer nach e Schrëtt méi weit mussen goen an zwar d'Memberschaft beim Klimabündnis.

Mam Bäitritt zum Klimabündnis gi mer eng Verpflichtung an fir éischens d'Ausscheide vun Zäregasen an eiser Gemeng ze reduzéieren an zweetens d'Populatiounen aus den Entwécklungslänner, déi am meeschten ënnert de Konsequenzen vum Klimawandel leiden, ze ënnerstëtzen. Member vu Klimabündnis ze ginn bréngt mat sech, dass mer eis net nëmme projetgebonnen Gedanken iwwert d'Klima maachen, mä dass mer eis an der alldeeglecher Gemengenaarbecht domat mussen auserneeetzen.

Mat all deem wat scho realiséiert ginn ass a nach wäert ginn, ka Käerjeng lo de Schrëtt a Richtung Klimabündnis maachen, an der Gewëssheet, dass och wierklech eppes wäert ëmgesat ginn.

Mam Bäitritt beim Klimabündnis triede mer engem Netzwierk vu Gemengen bei, wou ee séier Ideeën a Gedanken kann austauschen. D'Gemeng kann hei vun enger jorelaanger Erfahrung profitéieren fir hier Zieler ze erreeschen. D'Klimabündnis huet eng Multitude vu Projete, déi an der Gemeng kënnen ëmgesat ginn, Dokumentatiouns- an Informatiounsmaterial a pädagogesch Moduler déi d'Gemeng ka benotze fir d'Bierger an d'Schüler ze informéieren. Ausserdeem huet d'Klimabündnis eegen Nord/Süd Projete déi d'Gemeng kann ënnerstëtzen. Fir des Projete bidden si dann och Ausstellungen a pädagogesch Material un.

Mär vun déi gréng fannen, dass lo den optimalen Zäitpunkt ass fir dem Schäfferot den Optrag ze ginn fir Member bei Klimabündnis ze ginn an dofir stëmme mär dëser Décisioun de Principe zou.